



**§ 1. Immikkoortortaqarfiup aqqa Nuummi Inuussutissarsiuteqartut Pegatigiiffiat; naalisarlugu  
N.S.I.P**

**§ 2. Immikkoortortaqarfiup angerlarsimaffia Nuuk**

**§ 3. Immikkoortortaqarfik Sulinermik Inuussutissarsiuteqartut Kattuffiannut (SIK) ilaavoq.**

#### **Siuneraq suliassallu**

**§ 4. Immikkoortortaqarfiup siunertaraa suliassaralugillu suliffeqarfinni sulisut sinniisaat suleqatigalugit**

- Immikkoortortaqarfiit allat SIK-llu ingerlatsivii allat, soorlu SIK-p allattoqarfia, kingunissalimmik suleqatiginerisigut ilaasortanut iluaqtissiinissaq.
- Sulisartut aamma lærlingit/ilinniartut sumiiffimiittut tamaasa ataatsimoortissallugit akissarsiatigut atorfearnikkullu atugassarisanik pitsasunik kiisalu sullivinni suliffeqarnikkut avatangiisnik toqqisisimanartunik angusaqarumalluni.
- Isumaqatigiissutit inatsisillu atuuttut – soorlu sullivimmi avatangiisit pillugit – illoqarfimmi/nunaqarfimmi suliffeqarfinni eqquutsinnejartarnissaat sulissutigissallugu.
- Ilasortat suliffeqannginnerisa napparsimanerisalu nalaanni pisariaqartitaminnik ikiorneqartarnissaasa sulissutiginissaat.
- Sulisartut peqatigiinneranni kammalaatigiinnerannilu katersuuffiussalluni.
- Ilasortat pisinnaatitaaffii pillugit siunnersortassallugit.
- Suliffinni isumaqatigiinnginnerni, soorlu inunnut aalajangersimasunut tunngatillugu suliassani ilasortat akuufigisaanni, ilasortat soqutigisaannik SIK-p allattoqarfia suleqatigalugu illersuissalluni.
- Illoqarfimmi/nunaqarfimmi suliffinni sulisut sinniisaannik qinersisarnissaq qulakkiissallugu, aammalu sulisut sinniisaasa qinerneqartut aqqinik SIK-p allattoqarfianut ilisimatitsissuteqartassalluni.
- Sulisut sinniisaasa suliaat pillugit sulisitsisunik isumaqatigiissutit malinneqarnissaat qulakkiissallugu.
- Sulisartunik ilasortangitsunik ilasortangortitsiniaassalluni.
- Ilasortaq kinaluunniit pisinnaatitaavoq suliffimmi sinnisoqanngikkuni sullivimmini atukkatigut ajornartorsiuteqarnermigut sullinneqarnissaminut peqatigiiffimmut saaffiginnissuteqassalluni.

#### **Ilasortat**

**§ 5. Ilasortangortinnejarsinnaapput kikkuugaluartulluunniit SIK-p malittarisassaani § 3-mi piumasaqaatinik naammassinnittut.**

*Imm. 2. Tapersersuilluni ilaasortanngortoqarsinnaavoq, tapersersuisutut ilaasortat Immikkoortortaqaifiup ataatsimeersuarnerani ilaasortanillu ataatsimiisitsinerani taaseqataasinnaanatillu qiningassanngortissinnaanngillat, taamaattorli oqaaseqarsinnaatitaassapput. Aammali tapersersuisutut ilaasortat Immikkoortortaqaifiup ataatsimeersuarnermi imaluunniit ilaasortanik ataatsimiisitsinerani ilaasortaanermut akiliutip aaliangersarneqarsimasup affaanik akiliuteqartassapput.*

**§ 6. Ilaasortanngorneq pissaaq immersugassamik immersuinikkut atsiuinikkullu. Ilaasortaajunnaarneq imaluunniit allannguutit taamatuttaaq nalunaarutigineqassapput.**

*Imm. 2. Ilaasortat nutaat immikkoortortaqaifiup sulinera pillugu paassisutissinneqartarnissaannut siulersuisut akisussaapput.*

#### **Ataatsimeersuarneq**

**§ 7. Ataatsimeersuarneq tassaavoq immikkoortortaqaifimmi oqartussaasoq qullerpaaq.**

*Imm. 2. Illeqquusumik ataatsimeersuarneq ukiut pingasukkaarlugit ingerlanneqartassaaq marsip qaammataa naatinnagu kingusinnerpaamillu sapaatip akunneri sisamat sioqqullugit najukkami atuagassiatigut nittarsaanikkut, taamaattoqarpat, kiisalu illoqarfiup/nunaqarfiup allagarsiiviisigut kiisalu suliffeqarfinni allagartaliilluni ilimasaaruteqarnikkut ataatsimeersuariartoqqusisoqartassalluni.*

*Imm. 3. Ataatsimeersuarnermi oqaaseqarsinnaatitaasut taasisinnaatitaasullu tassaapput ilaasortat ilaasortaanermut akiliuteqarsimasut tamarmik. Pisinnaatitsissuteqarluni imaluunniit allakkatigut taasisoqarsinnaanngilaq.*

**§ 8. Illeqquusumik ataatsimeersuarnermi ullormut oqaluuserisassat ikinnerpaamik makkuninnga imaqsapput:**

1. Ataatsimeersuarnermi aqutsisussamik imaqarniliortussamillu toqqaaneq
2. Siulersuisut nalunaarutaat
3. Naatsorsuutinik kukkunersiukkanik ilisimatissutitut saqqummiussineq
4. Siunnersuutit takkuttut
5. Ilaasortaanermut akiliutip aalajangersarneqarnera
6. Missingersuutit akuerineqarnerat
7. Siulersuisunut qinersineq
  - a) Siulittaasoq
  - b) Siulittaasup tullia
  - c) Siulersuisunut ilaasortat 3
  - d) Sinniisussat 5
8. Taasariaqartut allat

**§ 9. Ilaasortat immikkoortortaqaifimmut atassuteqartut tamarmik siulersuisunut qinigaasinnaapput.**

**§ 10. Siunnersuutit ataatsimeersuarnermi eqqartortikkusutat siulersuisunit tiguneqareersimassapput ataatsimeersuarnissaq kingusinnerpaamik ullunik 14-nilik sioqqullugu. Ilaasortat § 7 imm. 3 naapertorlugu**

oqaaseqarsinnaatitaallutilu taasisinnaatitaasut tamarmik siunnersuutnik taamaattunik saqqummiussi-sinnaapput. Ataatsimeersuarnissaq sapaatip akunnera ataaseq sioqquillugu oqaluuserisassatut siunnersuutit allaffimmut aaneqarsinnaapput.

**§ 11.** Ataatsimeersuarnermi nalinginnaasumik amerlanerussuteqarnikkut aalajangersaasoqartassaaq, malittarisassani allamik allassimasoqanngippat. Taasinerit naligiippata siunnersuut peerneqassaaq; taamaattorli inummik qinersineq ingerlanneqarpat qinersisoqaqqissaaq. Qinerseqqinnermi taasinerit naligiippata makitsinikkut qinersineq ingerlanneqassaaq.

*Imm. 2.* Allalluni taasinerit ingerlanneqartassapput, tamanna ataatsimiinnermi peqataasumit – ataatsimit - kissaatigineqarpat, kiisalu siulersuisunut qinigassanngortittut siulersuisuni ilaasortanit amerlanerit qinigassanngortippata.

**§ 12.** Ataatsimeersuarnermi SIK-p malittarisassaanut immikkoortortaqarfiullu nammineq malittarisassaanut akerliusunik aalajangiisoqarsinnaanngilaq, aalajangiinerillu pisassapput SIK-p ataatsimeersuarnerani imaluunniit nakkutilliisoqarfimmi siulersuisuunerniluunniit aalajangiinerit ataqqillugit.

**§ 13.** Ataatsimeersuarnermit imaqarniliaq SIK-p allattoqarfianut nassiunneqassaaq kingusinnerpaamik ataatsimeersuarnermit sap. ak. 3 qaangiutsinnagit.

#### **Immikkut ittumik ataatsimeersuarneq**

**§ 14.** Immikkut ittumik ataatsimeersuartoqarsinnaavoq siulersuisuni amerlanerussuteqartut tamanna pisariaqartutut isigippassuk imaluunniit sulisut sinnisaasa pingajorarterutaasa ilaasortalluunniit pingajorarterutaasa atsiornermikkut tamanna piumasarippassuk. Piumasarineqartoq ullormut oqalu-serisassatut siunnersummik ilaqtinnejassaaq.

*Imm. 2.* Immikkut ittumik ataatsimeersuarneq ingerlanneqassaaq tamatuminnga piumasaqarnerup siulersuisunit tiguneqarneranit kingusinnerpaamik sap. ak. 3 qaangiutsinnagit.

*Imm. 3.* Immikkut ittumik ataatsimeersuariaqqusisoqassaaq sivikinnerpaamik ullut 14-it sioqquillugit najukkami atuagassiatigut nittarsaanikkut, taamaattoqarpat, kiisalu illoqarfiup/nunaqarfiup allagarsiiviisigut kiisalu suliffeqarfinni allagartaliilluni.

*Imm. 4.* Immikkut ittumik ataatsimeersuarnermi siulersuisunut qinersisoqarpat qinersineq ileqquusumik ataatsimeersuarnissap tulliuttup tungaanut atuutissaq. Qinerasinerlu pisinnaavoq immikkut ittumik ataatsimeersuarnermi peqataasut amerlanerussuteqartut kissaateqarnerisigut.

Qinerasinerlu pisinnaavoq immikkut ittumik ataatsimeersuarnermi peqataasut amerlanerussuteqartut kissaateqarnerisigut.

*Imm. 5.* § 9 aamma §§ 11-13 taamatuttaaq atorneqassapput immikkut ittumik ataatsimeersuarnermi.

#### **Ilaasortat ataatsimiinnerat**

**§ 15.** Ukiuni ataatsimeersuarfiunngitsuni ilaasortanik ataatsimiisitsisoqartassaaq. Ataatsimiinneq marsi

naatinnagu pissaaq, sivikinnerpaamillu ullunik 14-inik sioqqullugu ataatsimiigiaqqusisoqassaaq najukkami atuagassiami, taamaattoqarpat, nittarsaanikkut kiisalu illoqarfiup/nunaqarfiup allagarsiiviisigut suliffeqarfinnilu allagarsiinikkut.

*Imm. 2.* Ilaasortat ilaasortanut akiliummik akiligassiissutaasimasumik akiliisimasut tamarmik ilaasortat ataatsimiinneranni oqaaseqarsinnaatitaallutillu taasisinnaatitaapput. Pisinnaatitsissuteqarluni imaluunniit allakkatigut taasisoqarsinnaanngilaq.

**§ 16.** Ilaasortat ataatsimiinneranni ullormut oqaluuserisassat ikinnerpaamik makkuninnga imaqassapput:

1. Ataatsimiinnermi aqutsisussamik imaqarniliortussamillu toqqaaneq
2. Siulersuisut nalunaarutaat
3. Naatsorsuutinik kukkunersiukkanik ilisimatitsissutitut saqqummiussineq
4. Siunnersuutit takkuttut
5. Ilaasortaanermut akiliutip aalajangersarneqarnera
6. Missingersuutit akuerineqarnerat
7. Taasariaqartut allat

**§ 17.** §§ 10-13 taamatuttaaq atorneqassapput ilaasortat ataatsimiinneranni.

#### **Siulersuisut**

**§ 18.** Siulersuisut immikkoortortaqarfiup ulluinnarni aqunneqarneranut akisussaasuupput, pisussaallutilu immikkoortortaqarfik SIK-p malittarisassai immikkoortortaqarfiullu nammineq malittarisassai naapertorlugit aqussallugu, soorlu siunertat suliassallu § 4-mi taaneqartut sulissutigineqarnerat qulakkiissallugu. Taamattaaq siulersuisut malissavaat SIK-p ataatsimeersuarnerani, nakkutilliisoqarfiani siulersuisuunerinilu aalajangiinerit kiisalu immikkoortortaqarfiup ataatsimeersuarnerani aalajangiinerit.

**§ 19.** Siulersuisut namminneq ulluinnarni suleriaasissartik aalajangersaavigissavaat, siulersuisut akornanni suliassat aalajangersimasut agguataarnissaannik minnerpaamik ilaqartussaq, kiisalu siulersuisut ataatsimiittarnissaannut sulisullu sinnisaannik ilaasortanillu ataatsimeeqatiginnittarnissamik pilersaaruteqassallutik.

*Imm. 2.* Siulersuisut aalajangiisinnaassuseqarput siulersuisuni ilaasortat ikinnerpaamik affaat peqataagaangata. Taasinerit naligiippata siulittaasup taasinera aalajangiisuussaaq. Siulittaasup peqannginnerani siulittaasup tulliata taasinera aalajangiisuussaaq. Aamma siulersuisut ataatsimiinneranni SIK-p Inuuusutti sinnerlugit peqataatitsoqarsinnaavoq, oqaaseqarsinnaatitaalluni siunnersuuteqarsinnaatitaallunilu.

*Imm. 3.* Siulittaasoq immikkoortortaqarfiup ingerlanneqarneranut akisussaasuni quillersaavoq, siulersuisulli aalajangererisigut tamanna siulersuisuni ilaasortamut allamut akisussaaffittut tunniunneqarsinnaalluni.

Aamma siulersuisut ataatsimiinneranni SIK-p Inuuusutti sinnerlugit peqataatitsoqarsinnaavoq, oqaaseqarsinnaatitaalluni siunnersuuteqarsinnaatitaallunilu.

*Imm. 4.* Immikkoortortaqarfiup ulluinnarni allaffissornikkut ingerlanneqarnera pillugu siulersuisut pisari-aqartunik aalajangiisassapput, tamatumani aamma allaffimmi sulisunik atorfinitstsinerit soraarsitsinerillu pillugit aalajangiinernik.

*Imm. 5.* Siulersuisunut ilaasortat allaffimmilu sulisut ajunngitsorsiassaat akissarsiaqartinneqarnerallu missingersuusiami ataatsimeersuarnermi imaluunniit ilaasortat ataatsimiinneranni akuersissutigineqartumi allassimassapput.

**§ 20.** Siulersuisut ataatsimiinnerannit imaqarniliaq SIK-p allattoqarfianut nassiunneqassaaq ataatsimiinnerup kingorna kingusinnerpaamik sap. ak. 3 qaangiutsinnagit.

**§ 21.** Siulersuisunut ilaasortaq Naalakkersuisunut ilaasortatut toqqarneqaruni imaluunniit borgmesteritut qinigaaguni siulersuisunut ilaasortaajunnaassaaq.

*Imm. 2.* Siulersuisunut ilaasortaq politikkikkut suliaqarnini pissutigalugu allamilluunniit pissuteqarluni siulersuisunut ilaasortatut suliassaminik isumaginnissinnaajunnaartutut naliliiguni, taanna siulersuisunut ilaasortaajunnaarniarluni aalajangersinnaavoq.

Tamanna taamaallaat piffissamut killilimmut atuuppat, pineqartoq sulinngiffeqarallarnissamut akuerineqaannarsinnaavoq. Sulinngiffeqarallarnissamut akuerineqartoq siulittaasuppat, siulittaasup tullia sulinngiffeqarallarnerup nalaani siulittaasutut atuutissaaq. Sulinngiffeqarallarnissamut akuerineqartoq siulittaasup tullerippagu, siulersuisut aalajangissapput siulersuisunut ilaasortaq sorleq sulinngiffeqarallarnerup nalaani siulittaasup tulliatut atuutissanersoq. Sulinngiffeqarallarnissamut akuerineqartoq siulersuisunut ilaasortaappat siulittaasuunngitsoq imaluunniit siulittaasumut tullunngitsoq, siulersuisut aalajangersinnaapput sinniisussamik siulersuisunut ilaasortanngortoqassasoq sulinngiffeqarallarnerup nalaani atuuttussamik, qinersinermi § 8-mi nr. 7-im i taaneqartumi taaneqarnerpaasimasumik.

*Imm. 3.* Siulersuisunut ilaasortaq immikkoortortaqarfiup aningasaataanik atornerluisimasoq siulersuisunut ilaasortaajunnaarsinneqarsinnaavoq. Aningasanik atornerluisimaneq ilaasortaajunnaarsitsinissaq pitinnagu kattuffiup kukkunersiusuanit uppernarsarneqassaaq. Aammattaq ilaasortaajunnaarsitsisoqarsinnaavoq siulersuisunut ilaasortaq paasissutissanik allagaatinilluunniit immikkoortortaqarfimmut ajoqtaasumik atorneqarsinnaasunik siulersuisunit akuerineqarnani ingerlatitseqqiisimappat.

*Imm. 4.* Imm. 1-3-mi taaneqartutut pisoqarnerani siulittaasoq siulersuisunut ilaasortaajunnaarpas siulittaasup tullia siulittaasunngussaaq ileqqusumik ataatsimeersuarnissami tulliuttumi siulittaasumik nutaamik qinersinissap tungaanut. Taava siulersuisut siulittaasup tullianik nutaamik qinersissapput. Tamatuma peqatigisaanik siulersuisuni sinniisussaq qinersinermi § 8-mi nr. 6-im i taaneqartumi taaneqarnerpaasimasoq siulersuisunut ilaasortatut atuutilissaaq.

Siulersuisut aalajangersinnaapput periaaseq qulaani taaneqartoq atornagu immikkut ittumik ataatsimeersuariaqqusisoqassasoq piaernerpaamik siulittaasussamik nutaamik qinersinissaq siunertalaralugu.

*Imm. 5.* Imm. 1-3-mi taaneqartutut pisoqarnerani siulittaasup tullia siulersuisunut ilaasortaajunnaarpas siulersuisut siulittaasup tullianik nutaamik qinersissapput siulersuisunut ilaasortat akornannit. Tamatuma peqatigisaanik siulersuisuni sinniisussaq qinersinermi § 8-mi nr. 7-im i taaneqartumi taaneqarnerpaasimasoq siulersuisunut ilaasortatut atuutilissaaq.

*Imm. 6.* Imm. 1-3-mi taaneqartutut pisoqarnerani siulersuisunut ilaasortamik siulittaasuunngitsumik imaluunniit siulittaasumut tullunngitsumik siulersuisunit tunuartoqarpat siulersuisuni sinniisussaq qinersinermi § 8 nr. 7-im i taaneqartumi taaneqarnerpaasimasoq ilaasortanngussaaq. Sinniisussat arlallit amerlaqatigiinnik taaneqarsimappata, imaluunniit sinniisussat taasinertaqanngitsumik qinigaasimappata, kina siulersuisunut ilaasortanngussanersoq makitsissutigineqassaaq.

*Imm. 7. Siulersuisunut ilaasortaq qinikkatut atorfeqartitaanngitsoq sullivimminik soraarsitaasimappat imaluunniit suliffissaaruteqqappat tamanna siulersuinut ilaasortaaneranut sunniuteqassanngilaq.*

### **Aningaasaqarneq, naatsorsuutit aamma kukkunersiuineq**

**§ 22. Immikkoortortaqarfip ukiumoortumik naatsorsuutaasa qaammatisiutit ukiuat malissavaat.**

*Imm. 2. Siulersuisut immikkoortortaqarfip naatsorsuutai akuersissutigissavaat, taakkulu tamatuma kingorna ilisimatitsissutitut ataatsimeersuarnermi imaluunniit ilaasortat ataatsimiinneranni saqqummiunneqassapput. Naatsorsuutit kukkunersiuisumit SIK-p ataatsimeersuarnerani qinerneqarsimasumit kukkunersiorneqartassapput.*

*Imm. 3. Peqatigiiffiup naatsorsuuserissunneqarnera SIK-p allattoqarfiani naatsorsuuserisumit ingerlanneqassaaq, taanna aammattaaq peqatigiiffiup kontuinut netbankikkut isersinnaanermut akuersisummik peqartussaalluni. SIK-p allattoqarfiaita qaammatit tamaasa naatsorsuutinut allattukkat anillatsillugit immikkoortortaqarfimmut nassiuttassavai.*

*Imm. 4. Peqatigiiffik nalilinnik pisissatillugu imaluunniit tunisissatillugu ulluinnarni aqutsisut siulersuisunilu ilaasortaq arlaat ataaseq atsiortassapput.*

NSIP malittarisassaani allassimasoqarpoq ulluinnarni aqutsisut siulersuisunilu ilaasortat tamarmik atsiortassasut, maannakkut “pingasuunnaat” atsiortartussanngorlugit inissitaavoq.

*Imm. 5. Peqatigiiffiup aningaasatigut ingerlanera siulersuisut akisussaaffigaat, ulluinnarnilu aqutsisut allaffisornermi aningaasatigut ingerlatsinerminni siulersuisunut ilisimatitsissuteqarnissamut pisussaaffeqarput.*

Massakkut taamaareerpoq NSIP malittarisassaanilu allassimasoq ilanngunneqarpoq allannguallatsinneqarluni ersarissunngorlugu.

### **Atsiornissamut maleruaqqusat aningaasanut akisussaassuseqarneq**

**§ 23. Immikkoortortaqarfik sinnerlugu atsiorsinnaatitaavoq siulittaasoq aamma ikinnerpaamik siulersuisuni ilaasortaq ataaseq. Taarsigassarsiaqarnermi aamma illuutigisamik tunisaqarnermi pisinermilu imaluunniit qularnaveeqquissinermi peqatigiiffik sinnerlugu siulersuisunut ilaasortat tamarmik atsioqataassapput.**

*Imm. 2. Immikkoortortaqarfimmut ilaasortat immikkoortortaqarfip pisussaaffigilersimasaanut inuttut ataasiakkaatut pisussaaffilerneqarsinnaanngillat.*

### **Malittarisassanik allanngortitsineq**

**§ 24. Malittarisassat taamaallaat ataatsimeersuarnermi 2/3-mik amerlanerussuteqartunit allanngortinnejarsinnaapput, tassani allanngortitsinissamut siunnersuut ullormut oqaluuserisassani allassimassalluni. Malittarisassat taakku minnerpaamik imaqassapput aalajangersakkanik immikkoortortaqarfifit malittarisassani nalinginnaasuni SIK-p ataatsimeersuarnerani akuersissutigineqarsimasuni allassimasunik.**

*Imm. 2. Malittarisassanik allanngortitsinerit ataatsimeersuarnermi akuersissutigineqarnerminnit atuutilis-sapput.*

### **Immikkoortortaqarfimmik atorunnaarsitsineq**

**§ 25.** Immikkoortortaqarfimmik atorunnaarsitsineq taamaallaat ataatsimeersuarnermi pisinnaavoq, tassani atorunnaarsitsinissaq ullormut oqaluuserissani allassimassalluni, ataatsimeersuarnermilu peqataasut 2/3-isa siunnersuut akuerippassuk.

*Imm. 2. Atorunnaarsitsinermi immikkoortortaqarfik akiitsoqarpat taakku akiligassaqarfinnut akilerneqassapput. Pigisat sinneruttut, tassunga ilanngullugit allattaaviit protokolit, imaqarniliat il.il., SIK-p allattoqarfianut tunniunneqassapput.*

*Nuummi Inuussutissarsiuteqartut Peqatigiiffiat 26.marts 2018 ataatsimeersuarnerani akuerineqarput.*

---

*Siulittaasoq*

---

*Siulittaasup tullia*

---

*Siulersuisunut ilaasortaq*

---

*Siulersuisunut ilaasortaq*

---

*Siulersuisunut ilaasortaq*